

## ক্ষুদ্র খামারিদের জন্য বাণিজ্যিক লেয়ার পালন

### ভূমিকা

দারিদ্র্যবিমোচনে পশুসম্পদের ভূমিকা সকল মহলে সমাদৃত ও পরীক্ষিত। বর্তমানে বাংলাদেশে বাণিজ্যিক ভিত্তিতে গবাদিপশু, হাঁস-মুরগির খামার স্থাপনে বেসরকারি উদ্যোগে পরিলক্ষিত হলেও অনেক উদ্যোক্তা আধুনিক প্রযুক্তি ও পুঁজির অভাবে ব্যর্থ হয়ে পড়েছে। যদিও বেসরকারি খামার স্থাপনে বাণিজ্যিক খামারিরা সরকারের নিকট থেকে আর্থিক সহযোগিতাসহ অন্যান্য সুযোগ-সুবিধা পেয়ে থাকেন। কিন্তু ক্ষুদ্র ও মাঝারি আকারের খামারিরা এ ধরনের সুবিধা থেকে বঞ্চিত। ক্ষুদ্র ও মাঝারি খামারিদের দারিদ্র্যবিমোচন তথা আত্ম-কর্মসংস্থান ও পারিবারিক পুষ্টির চাহিদা পূরণের লক্ষ্যে বাংলাদেশ পশুসম্পদ গবেষণা ইনস্টিটিউট একটি লাগসই যুগোপযোগী লেয়ার মডেল উদ্ভাবন করেছে।



এই মডেলের আওতায় একজন ক্ষুদ্র খামারি ২০০ টি লেয়ার মুরগি পালন করে তার পারিবারিক পুষ্টি চাহিদা দৈনন্দিন সাংসারিক খরচাদি ও সন্তান-সন্ততির শিক্ষাসহ যাবতীয় খরচ মিটিয়ে বৎসরে প্রায় ৮০০০ থেকে ৯০০০ টাকা সঞ্চয় করতে পারবে। তাছাড়া, একজন খামারি তার নিজস্ব পারিবারিক শ্রমকে সঠিকভাবে প্রয়োগের মাধ্যমে আত্মকর্মে নিয়োজিত থেকে এ দেশের প্রোটিন ঘাটতি পূরণে সক্রিয় ভূমিকা পালন করতে পারবে। তাই, আত্ম-কর্মসংস্থান, দারিদ্র্যবিমোচন এবং প্রাণিজ আমিষের ঘাটতি পূরণসহ জাতীয় অর্থনীতিতে লেয়ার মডেল গুরুত্বপূর্ণ ভূমিকা পালন করতে পারে।






### মডেলের সংক্ষিপ্ত বিবরণ

লেখার পালন মডেলটি বাস্তবায়নের জন্য নিম্নে বর্ণিত অংগ (Component) গুলি সুষ্ঠুভাবে ব্যবহার করতে হবে :

১. সঠিকভাবে সুফলভোগী/খামারি নির্বাচন,
২. খামারি সংগঠন তৈরি,
৩. পারিবারিক প্রশিক্ষণ গ্রহণ,
৪. খামারের উপযুক্ত স্থান নির্বাচনে এবং স্থানীয় সম্পদ ব্যবহার করে নির্ধারিত ডিজাইনে বায়োসিকিউরিটি রক্ষা মূলক মুরগির ঘর তৈরি,
৫. বাচ্চার উপযুক্ত ক্রেডিং,
৬. মুরগির সঠিক জাত বা স্ট্রাইন নির্বাচন,
৭. গুণগত মান সম্পন্ন সুস্বাদু খাদ্য তৈরি এবং সঠিকভাবে ব্যবহার,
৮. উপকরণের মাধ্যমে ক্ষুদ্র ঋণের ব্যবস্থা করা,
৯. সংগঠনের মাধ্যমে সকল উপকরণ ক্রয় এবং খামারের উৎপাদিত পণ্য বিক্রয় করা,




১০. নিয়মিতভাবে সদস্যদের মতবিনিময় সভা করা,

১১. সংগঠনের সদস্যদের জন্য আপদকালীন আর্থিক সংস্থান রাখার ব্যবস্থা করা।

### মডেল বাস্তবায়ন কৌশল

#### খামারি নির্বাচন ও সংগঠিতকরণ

বাংলাদেশের যে কোনো এলাকায় ক্ষুদ্র ও মাঝারি ১০-১২ জন উৎসাহী/আগ্রহী, স্বল্প শিক্ষিত, পরিশ্রমী ও সং মহিলা/পুরুষ বা বেকার যুবককে খামারি হিসেবে নির্বাচন করত তাদেরকে সংগঠিত করা হয়। তবে নির্বাচিত খামারিদের যাতে লেয়ার খামার স্থাপনের জন্য নিজস্ব জমি থাকে এবং সেই স্থানটি লেয়ার পালনের জন্য অবশ্যই যথোপযোগী হতে হবে। নির্ধারিত খামারিদের সংগঠনের আওতায় আনলে খামারিরা দলগতভাবে খাদ্য, টিকা ও খাদ্য মিশ্রিত করণ প্রভৃতি কাজ মিলেমিশে করতে পারে। তাছাড়া, দলগতভাবে কাজ করলে খামারিরা তাদের খামারের ব্যবস্থাপনা বিষয়ক সমস্যা সম্পর্কে একে অপরের সাথে মতবিনিময়ের ফলে নিজেরাই নিজেদের সমস্যার সমাধান করতে পারে।



## নির্বাচিত খামারির পারিবারিক প্রশিক্ষণ

নির্বাচিত খামারিকে লেয়ার পালনের ওপর এক সপ্তাহের একটি প্রশিক্ষণ দেয়া হয় এবং এই প্রশিক্ষণে লেয়ার পালনের তাত্ত্বিক বিষয়সমূহ যেমন, ঘর তৈরি, লেয়ার বাচ্চার ব্রুডিং ব্যবস্থাপনা, সুখম রেশন ফরমুলেশন, টিকাদান কর্মসূচি, খাদ্য সংরক্ষণ, লেয়ারের বিভিন্ন রোগ ও প্রতিকার, বায়োসিকিউরিটি, আলোক ব্যবস্থাপনা, জীবাণুনাশকের ব্যবহারের গুরুত্ব, রেকর্ড সংরক্ষণের গুরুত্ব, বাজারজাতকরণ এবং খামারের আয়-ব্যয়ের হিসাবের পাশাপাশি সকল বিষয়ে ব্যবহারিক প্রশিক্ষণের ব্যবস্থা করা হয়। যাতে একজন নতুন খামারি “হাতে করে শিখে” বাস্তব জ্ঞান লাভ করতে পারে। প্রশিক্ষণের ক্ষেত্রে পরিবারের দুইজন সদস্যকে অবশ্যই প্রশিক্ষণ গ্রহণ করতে হবে। খামারের সকল প্রয়োজনে পারিবারিক সহযোগিতা নিশ্চিত হবে।

## ফলোআপ প্রশিক্ষণ


দুই এক ব্যাচ মুরগি পালনের পর সমস্যাভিত্তিক ফলোআপ প্রশিক্ষণের ব্যবস্থা অত্যন্ত কার্যকর।

খামারের উপযুক্ত স্থান নির্বাচন এবং স্থানীয় সম্পদ ব্যবহার করে নির্ধারিত ডিজাইনে মুরগির বায়োসিকিউরিটি রক্ষামূলক ঘর তৈরি :

## খামারের স্থান নির্বাচন


তত্ত্বীয়ভাবে পোল্ট্রি খামারের জন্য যে সমস্ত শর্ত পালন করে স্থান নির্বাচন করার কথা তা পুরোপুরি সম্ভব না হলেও নিম্নলিখিত শর্ত পালনপূর্বক স্থান নির্বাচন করা দরকার। স্থান নির্বাচনের ক্ষেত্রে যে সমস্ত শর্তসমূহ পালন করা দরকার তা নিম্নরূপঃ

১. উঁচু এবং ভালো নিষ্কাশন ব্যবস্থাসহ আবাসিক আবাসন হতে একটু দূরে হওয়া ভাল,
২. আশপাশে খামার থাকলে তা নিরাপদ দূরত্বে থাকা বাঞ্ছনীয়,
৩. লিটার সরিয়ে ফেলার ভালো ব্যবস্থা /সুযোগ থাকা প্রয়োজন,
৪. আশপাশে পঁচা ডোবা ও নর্দমামুক্ত হতে হবে,
৫. যোগাযোগের ব্যবস্থা থাকতে হবে,
৬. বিশুদ্ধ পানি ও বিদ্যুতের ব্যবস্থা থাকতে হবে,
৭. খামার পরিচালনার জন্য পরিবারের সদস্যদের যথেষ্ট আগ্রহ থাকতে হবে,
৮. বাজারজাতকরণের সুবিধা থাকতে হবে।



## বাসস্থান নির্মাণ

ডিমপাড়া মুরগি পালনের ক্ষেত্রে খামারের আকার অত্যন্ত গুরুত্বপূর্ণ বিষয়। একজন ক্ষুদ্র খামারির জন্য ২০০ টি মুরগি পালন উপযোগী ঘরের নকশা এবং নির্মাণ নিম্নে দেয়া হলো। ২০০ টি মুরগি পালনের জন্য সার্ভিস এরিয়াসহ (৫+২৫) X ১২ বর্গফুট জায়গাই যথেষ্ট। এতে প্রতিটি মুরগির জন্য প্রায় ১.৫২ বর্গফুট জায়গা দেয়া হয়েছে। ঘরটি পূর্ব-পশ্চিমে লম্বালম্বিভাবে নির্মাণ করতে হবে যাতে সূর্যের আলো ঘরের মধ্যে সরাসরি প্রবেশ করতে না পারে এবং বায়ু এক পাশ থেকে প্রবেশ করে অন্য পাশ দিয়ে বেরিয়ে যেতে পারে। এতে বিশুদ্ধ বায়ু ঘরের মধ্যে প্রবেশ করে এ্যামোনিয়াসহ অন্যান্য বিষাক্ত গ্যাস বিতরিত হয়ে মুরগির জন্য আরামদায়ক পরিবেশের সৃষ্টি করবে এবং যা লিটার শুষ্ক রাখতে সাহায্য করবে।



## ঘরের বর্ণনা

### মেঝে

মাচা পদ্ধতিতে মুরগি পালনের জন্য ঘরের নকশা উপরে দেয়া হয়েছে। এলাকাভিত্তিক প্রাপ্ত উপকরণের ভিত্তিতে বাঁশের অথবা সুপারি গাছের ফালি দিয়ে মাচা তৈরি করা যায়। মুরগির বিষ্ঠা ভালোভাবে নিচে পড়ে যাওয়ার জন্য এক ফালি থেকে অন্য ফালির দূরত্ব ১ ইঞ্চি রাখা হয়েছে। প্রতিটি ঘরে ৬০ বর্গফুটের একটি সার্ভিস এরিয়া রাখা হয়েছে, যা খাদ্য, ঔষধ পত্র এবং অন্যান্য পোল্ট্রী উপকরণ রাখতে সাহায্য করবে। মাচা ভূমি থেকে সাড়ে তিন ফুট উচুতে করা হয়েছে যাতে লিটার পরিষ্কারে সুবিধা হয় এবং লিটার সব সময় শুকনা থাকে।

### পাশের বেড়া

সার্ভিস এরিয়া ছাড়া অন্য দিকের বেড়াগুলো বাঁশের চটা দিয়ে ১ বর্গ ইঞ্চি তার জালি তৈরি করা



যায় যাতে পর্যাপ্ত বায়ু চলাচল করতে পারে। তবে বাঁশের পরিবর্তে বাজারে যে গ্যালভানাইজড তারের তারজালি পাওয়া যায় তাও ব্যবহার করা যায়।

### চালা

স্থানীয়ভাবে প্রাপ্ত সামগ্রী উপকরণ যেমন- ছন, গোলপাতা, বাশের চাটাই প্রভৃতি দিয়েই ঘরের চালা তৈরি করা যায়। তবে ছন এবং গোলপাতা দিয়ে তৈরি চালা পোল্ট্রি পালনের জন্য বিশেষ উপযোগী বলে গবেষণায় প্রমাণ পাওয়া গেছে। তাছাড়া অপেক্ষাকৃত সস্তা টেউটিন, পলিথিন প্রভৃতি চালা তৈরিতে ব্যবহার করা যেতে পারে। তবে টিন দিয়ে চালা তৈরি করলে অবশ্যই টিনের নিচে তাপ নিরোধক যেমন বাঁশের চাটাই ব্যবহার করতে হবে।

### ঘর জীবাণুমুক্তকরণ

সঠিক স্বাস্থ্যবিধি পালন লাভজনক মুরগির খামারের পূর্বশর্ত। তাই ঘর তৈরির পর প্রথম কাজ হচ্ছে ঘর জীবাণুমুক্তকরণ। প্রথমে ঝাড়ু এবং পরে ব্রাশ দিয়ে ঘসে ধুলাবালি ও ময়লা পরিষ্কার করার পর পরিষ্কার পানি দিয়ে সম্পূর্ণ ঘর ধুয়ে দিতে হবে। অতপর জীবাণুনাশক দিয়ে সম্পূর্ণ ঘর ভিজিয়ে ১ দিন রেখে দিতে হবে। স্থানীয়ভাবে বাজারে অনেক জীবাণুনাশক পাওয়া গেলেও ক্লোরেক্স নামক তরল জীবাণুনাশক ব্যবহার করে ভালো ফল পাওয়া গেছে। উৎপাদনকারী ব্যবহারবিধি অনুসারে মিশ্রণ অনুপাতে ১০ লিটার পানির সাথে এবং ৪০ মিলি ক্লোরেক্স মিশিয়ে ব্যবহার করতে হবে। নতুবা বাচ্চা অতি সহজেই রোগাক্রান্ত হওয়ার আশংকা থাকে। ঘরে বাচ্চা সরবরাহের কমপক্ষে এক সপ্তাহ পূর্ব থেকে পরিষ্কার ও জীবাণুমুক্তকরণ প্রক্রিয়া শুরু করা উচিত। প্রথম দিন ঝাড়ু ও পানি দিয়ে পরিষ্কার করতে হবে এবং দ্বিতীয় দিন ঝাড়ু, ব্রাশ ও পানি দিয়ে পরিষ্কার, তৃতীয় ও চতুর্থ দিন সকালে জীবাণুনাশক দিয়ে পরিষ্কার করতে হবে এবং সবশেষে পরিষ্কার পানি দ্বারা ধুয়ে ফেলতে হবে।

### বাচ্চা উঠানোর আগে মুরগির ঘর তৈরিকরণ

#### ধাপসমূহ

১. পরিষ্কার পানি দিয়ে মুরগির ঘর স্বেপ করে পরিষ্কার করা।
২. পানির সাথে নির্দিষ্ট পরিমাণ জীবাণুনাশক মিশিয়ে মুরগির ঘর স্বেপের মাধ্যমে জীবাণুনাশকরণ। (ক্লোরেক্স-৪০মি.লি./১০ লিটার পানি)।
৩. এয়ার টাইড ঘরের ক্ষেত্রে ধূমায়িতকরণের মাধ্যমে জীবাণুমুক্তকরণ ভালো।
৪. মুরগির ঘরে ক্যানপি এবং চিকগার্ড লাগানো।
৫. ঘরের তাপমাত্রা এবং আর্দ্রতা পরীক্ষাকরণ।
৬. খাবারের পাত্র এবং পানির পাত্র জীবাণুমুক্ত করা।
৭. ঘরে মুরগির বাচ্চা উঠানো।





## বাচ্চার উপযুক্ত ক্রডিং

প্রচলিত বৈদ্যুতিক পদ্ধতিতে অথবা বিএলআরআই কতৃক উদ্ভাবিত বাঁশের তৈরি চিক ক্রডার ব্যবহার করেও ক্রডিং করা যায়। যদি বিএলআরআই কতৃক উদ্ভাবিত চিক ক্রডারের নির্মাণ ব্যয় একটু বেশি তথাপিও এর কার্যকারিতা অন্যান্য ক্রডারের চেয়ে অনেক ভালো। ক্রডিংকালীন সময়ে তাপমাত্রা ও আর্দ্রতা নিয়ন্ত্রণ রাখা প্রধান বিবেচ্য বিষয়। যে পদ্ধতিতেই ক্রডিং করা হোক না কেন তাপমাত্রা ও আর্দ্রতা সঠিক রাখতে হবে তা না হলে বাচ্চার সঠিক বৃদ্ধি সম্ভব হবে না। ঋতুভেদে ক্রডিং সময়কাল পরিবর্তন হতে পারে যেমন, গ্রীষ্মকালে ২-৩ সপ্তাহ আবার শীতকালে ৩-৪ সপ্তাহ ক্রডিং করতে হতে পারে। ক্রডিং-এর সময় যে তাপমাত্রা বজায় রাখতে হবে তা নিম্নে দেয়া হলো।

সপ্তাহ	তাপমাত্রা
১ম	৯৫° সে :
২য়	৯০° সে :
৩য়	৮৫° সে :
৪র্থ	৮০° সে :
৫ম	৭৫° সে :
৬ষ্ঠ	৭০° সে :

প্রচলিত পদ্ধতিতে ক্রডিং-এর জন্য সবচেয়ে গুরুত্বপূর্ণ বিষয় হচ্ছে চিকগার্ড স্থাপন। সাধারণত ২ ফুট উচ্চতা বিশিষ্ট চিকগার্ড হোভার থেকে ২.০- ২.৫ ফুট দূরে স্থাপন করা হয়। চিকগার্ড হিসেবে হার্ডবোর্ড, বাঁশের চাটাই ইত্যাদি ব্যবহার করা যায়। তবে স্থানীয়ভাবে প্রাপ্ত বাঁশের চাটাই অথবা ফ্রেমের মধ্যে পাতলা চট দিয়েও চিকগার্ড বানানো যায়। অবস্থা এবং সহজ লভ্যতার ওপর ভিত্তি করে চিকগার্ড বানাতে হবে এবং তা স্থাপনের পূর্বে, পূর্বের নিয়মে যথাযথভাবে জীবাণুমুক্ত করতে হবে।

ক্রডিং করার সময় ক্রডারের ভেতরের বাচ্চার অবস্থা দেখে বুঝতে হবে তাপমাত্রা সঠিক আছে কি না? এ জন্য নিবিড়ভাবে পর্যবেক্ষণ করতে হবে। সাধারণত ক্রডারের ভেতর বাচ্চার অবস্থান তিনটি অবস্থায় বিরাজ করতে পারে।



## আরামদায়ক অবস্থা


বাচ্চা ক্রডারের ভেতর ছড়ানো ছিটানো অবস্থায় থাকবে।



বাচ্চার অবস্থান, আরামদায়ক অবস্থা বিদ্যমান।

## অতিরিক্ত গরম

এ অবস্থায় বাচ্চা ক্রডারের ভেতর চিকগার্ডের গায়ের দিকে সরে থাকবে অর্থাৎ চিকগার্ড ঘেঁষে অবস্থান করবে।



**অতিরিক্ত ঠান্ডা :** এ অবস্থায় বাচ্চাগুলো হোভারের খুব কাছাকাছি চলে এসে গাদাগাদি করবে।





## প্রতিকার

অতিরিক্ত গরম বা ঠান্ডায় তাপের উৎসের তাপমাত্রা যথাক্রমে কমিয়ে বা বাড়িয়ে সঠিক তাপমাত্রা সমন্বয় করতে হবে।

## বাচ্চার প্রথম খাদ্য

লেয়ার বাচ্চা খামারে পৌছানোর পর পরই প্রথম গুকোজ, ওয়াটার সলিউবল ভিটামিন এবং ভিটামিন 'সি' মিশ্রিত পানি (প্রতি লিটারে ২৫ গ্রাম গুকোজ, ১ গ্রাম ভিটামিন WS, এবং ১ গ্রাম ভিটামিন 'সি') চিকগার্ডের পানির পাত্রে সরবরাহ করতে হবে। অতপর চিকগার্ডের ভেতরে বাচ্চা ছাড়তে হবে। প্রয়োজনে বাচ্চা ছাড়ার পূর্বে বাচ্চার ঠোট গুকোজ ও ভিটামিন মিশ্রিত পানিতে ডুবিয়ে পানি পান করাতে হবে। এখানে বিশেষভাবে লক্ষ্য রাখতে হবে যে, বাচ্চা ছাড়ার পর কমপক্ষে ৩ ঘন্টা ভিটামিন মিশ্রিত পানি পান করার পর বাচ্চার পরিপাকতন্ত্র সচল হলে প্রথম দিন গম বা ভূট্টার দানা বা বাচ্চার জন্য তৈরিকৃত খাদ্যের যোগান দেয়া যেতে পারে। তারপর লেয়ার স্টারটার সরবরাহ করা হয়। লেয়ার স্টারটারে শতকরা ১৬-১৭ ভাগ প্রোটিন ২৮০০-২৯০০ কিলো ক্যালরি বিপাকীয় শক্তি (ক্যালরি/কেজি) থাকে। প্রথম সপ্তাহে প্রতিটি বাচ্চার জন্য গড়ে ৬-৮ গ্রাম খাবার দরকার হয়।

## মুরগির সঠিক জাত বা স্ট্রেইন নির্বাচন

মুরগির খামারে লাভ-ক্ষতির অনেক অংশ নির্ভর করে উপযুক্ত ও সঠিক মুরগির জাত বা স্ট্রেইন নির্বাচনের ওপর। আবহাওয়া, খাদ্যের গুণগতমান, ঘরের ধরন ও ব্যবস্থাপনা, উৎপাদন ক্ষমতা, রোগ প্রতিরোধ ক্ষমতা ইত্যাদির ওপর ভিত্তি করে সঠিক জাত বা স্ট্রেইন নির্বাচন করতে হবে। খামারের জন্য এক দিনের বাচ্চা সংগ্রহের ক্ষেত্রে বিশেষ গুরুত্ব দিতে হবে। গুণগত মানসম্পন্ন নিরোগ বাচ্চা ভালো উৎস থেকে সংগ্রহ করতে হবে।

## গুণগত মানসম্পন্ন খাদ্য তৈরি এবং সঠিক ব্যবহার নিশ্চিতকরণ

গুণগত মান সম্পন্ন খাদ্য এবং তার সঠিক ব্যবহার মুরগি পালনের জন্য অত্যন্ত গুরুত্বপূর্ণ। আমরা জানি মুরগি পালনে খাদ্যে প্রায় ৬০-৭০ ভাগ খরচ হয়। ভালো খাদ্য তৈরি বা ক্রয় এবং এর সুষ্ঠু ব্যবহার লাভজনক মুরগি পালনে অত্যাৱশ্যক।

## বাড়ন্ত বাচ্চা পালন

ব্রুডিং শেষে ১৮ সপ্তাহ বয়স পর্যন্ত সময় কালকে সাধারণত বাড়ন্ত অবস্থা বলা হয়। এ সময়টা ডিম পাড়া মুরগির জন্য অত্যন্ত গুরুত্বপূর্ণ কেননা বাড়ন্ত অবস্থার ওপর নির্ভর করে ভবিষ্যৎ ডিম উৎপাদন। বাড়ন্তকালীন সময়ে ঝাঁকের সমতা সবচেয়ে গুরুত্বপূর্ণ বিষয়। ঝাঁকের সব মুরগি গুলোর দৈহিক ওজন কাছাকাছি না থাকলে সবল বাচ্চা প্রতিযোগিতা করে বেশি খাদ্য খেয়ে ফেলে আর দুর্বল বাচ্চাগুলো আরো দুর্বলতর হতে থাকে। তাই সকল বাচ্চার মধ্যে সমতা আনায়নের জন্য অপেক্ষাকৃত দুর্বল বাচ্চার দিকে নিবিড় তদারকির বিশেষ প্রয়োজন।




সমতা রক্ষার জন্য খাদ্য গ্রহণের স্থান অর্থাৎ খাদ্য পাত্রের সংখ্যা অধিক গুরুত্বপূর্ণ। খাবার পাত্র ও পানির পাত্রের সংখ্যা কম হলে বাচ্চার দৈনিক ওজনের সমতা আনয়নে ব্যাঘাত ঘটে। বাংলাদেশে প্রচলিত খাদ্য পাত্রে সাধারণত ১৪টি বা ১৮টি মুরগির একত্রে খাদ্য গ্রহণের স্থান থাকে। তাই মোট মুরগির সংখ্যাকে ১৪ কিংবা ১৮ দিয়ে ভাগ করলে যে ভাগফল পাওয়া যায় তার পূর্ণ সংখ্যা হিসাব করে খাদ্য পাত্র স্থাপন করলে ভালো ফল পাওয়া যায়। পানির পাত্রের ক্ষেত্রেও অনুরূপ ব্যবস্থা নিতে হবে। মুরগির বাড়ন্ত অবস্থায় ঠোঁট কাটলে ভালো ফল পাওয়া যায়। ঠোঁট না কাটলে প্রতিদিন মুরগির ঘরে শাক সবজি পরিষ্কার করে ঝুলিয়ে রাখলে ঠোকরা ঠুকরির মত বদ অভ্যাস অনেক কমে যাবে। তবে লেয়ার মুরগিকে দুই বার ঠোঁট কাটা উত্তম। এক বার ৬-১৪ দিনের মধ্যে এবং আর এক বার ১২-১৬ সপ্তাহ বয়সে। কোন কোন সময় তিন বারও ঠোঁট কাটার প্রয়োজন হয়ে থাকে।

### প্রি-লেয়ার

সাধারণত ১৮-২০ অথবা ১৮-২২ সপ্তাহ বয়স পর্যন্ত মুরগিকে প্রি-লেয়ার বলা হয়। এ সময় মুরগির ঝাঁকের গড় ওজন কাক্সিত লক্ষ্যমাত্রার কাছাকাছি আছে কি না তা পরীক্ষা করা দরকার। এই সময় বাড়ন্ত রেশনের পরিবর্তে প্রি-লেয়ার রেশন সরবরাহ করা প্রয়োজন। ২০ সপ্তাহ বয়সে ঝাঁকের ওজন লক্ষ্যমাত্রার কাছাকাছি থাকলে দিনের আলোর সাথে অতিরিক্ত আলো সরবরাহের মাধ্যমে উদ্দীপনা দেয়া প্রয়োজন। এ সময় ডিম উৎপাদন শতকরা ৫ ভাগ অতিক্রম করলে প্রি-লেয়ার ফিডের পরিবর্তে লেয়ার ফিড সরবরাহ করতে হবে। পুলেট কালিন সময়ের শুরুতে মুরগির ঘরে ডিম পাড়ার বাক্স বসাতে হবে।

### ডিমপাড়া মুরগি পালন

মুরগির যখন ডিম দেয়া শুরু করবে তখন থেকে ভালোভাবে পর্যবেক্ষণ করতে হবে। কোনো ধরনের বদ অভ্যাস সৃষ্টি হয় কি না যেমন অনেক ক্ষেত্রে মুরগির ডিম ভেঙে ফেলে, মলদ্বার ঠোকরানো অথবা ডিম ভেঙে খাওয়া শুরু করা। এ সমস্ত বদঅভ্যাস যদি দেখা দেয় তবে শীঘ্রই প্রতিকারমূলক ব্যবস্থা নিতে হবে। বিভিন্ন কারণে এগুলো হতে পারে এ জন্য প্রথমেই কারণ অনুসন্ধান করা প্রয়োজন এবং অভিজ্ঞ পোল্ট্রি বিশেষজ্ঞের পরামর্শ গ্রহণ করা আবশ্যিক। ডিমপাড়া কালিন সময়ে আলো প্রদানের বিষয়টি অত্যন্ত গুরুত্বপূর্ণ। গড়ে ১৬ ঘন্টা আলোক প্রদান, আদর্শ ডিম উৎপাদনের জন্য প্রয়োজন। খাদ্য ও পানি সরবরাহ নির্দিষ্ট সময় অন্তর অন্তর সরবরাহ করতে হবে। এর ব্যতিক্রম হলে ডিম উৎপাদনের ওপর ব্যাপক প্রভাব ফেলতে পারে। তাই রুটিনমাসিক কাজ, লাভজনক পোল্ট্রি পালনের চাবিকাঠি। এ সময় মুরগির ডিমপাড়ার জন্য ডিমপাড়ার বাক্স ঘরের মধ্যে স্থাপন করতে হবে। প্রতি ৪-৫ টি মুরগির জন্য ১টি ডিমপাড়ার বাক্স বরাদ্দ রাখতে হয়। ডিম পাড়া বাক্সের পরিমাপ ১ X ১ X ১.২০ (দৈর্ঘ্য X প্রস্থ X উচ্চতা) ঘনফুট হলেই চলে। মুরগির ঘরের অন্ধকার যুক্তস্থানে যেখানে কম আলো এবং যেখানে মুরগি কম চলাফেরা করে সেই স্থানে মুরগির ডিম পাড়ার বাসা দিতে হবে। ডিম পাড়া বাসার সাথে পরিচিতির জন্য অন্তত ২ সপ্তাহ আগে থেকেই ডিম পাড়ার বাসা ঘরে স্থাপন করতে হবে।




## খাদ্য ব্যবস্থাপনা

খাদ্য প্রস্তুত এবং খাদ্য সংরক্ষণ খাদ্য ব্যবস্থাপনার প্রধান অংশ। খাদ্য উপাদান ক্রয়ের সময় সতর্কতামূলক ব্যবস্থা গ্রহণ করতে হবে এবং এ জন্য খাদ্য সম্পর্কে পূর্ব অভিজ্ঞতা অর্জন করতে হবে। খাদ্যের গুণগতমান অবশ্যই ভালো হতে হবে। নিম্নের চারটি রেশনের ফলাফল পরীক্ষা করে দেখা গেছে যে এদের কার্যকারিতা অত্যন্ত ভালো।

## স্টারটার রেশন

ক্রমিক নং	উপাদান	পরিমাণ (কেজি)
১।	গম	৩৫ কেজি
২।	ভূট্টা	১৬.৯ কেজি
৩।	সয়াবিন	২৭.০ কেজি
৪।	চালের কুঁড়া	১৪.৮ কেজি
৫।	বিনুক চূর্ণ	১.৫ কেজি
৬।	ডি সি পি	১.৫ কেজি
৭।	ভিটামিন প্রিমিক্স	০.২৫ কেজি
৮।	লাইসিন	০.১৫ কেজি
৯।	মিথিওনিন	০.১৫ কেজি
১০।	সয়াবিন তেল	২.৫০ কেজি
১১।	খাবার লবণ	০.২৫ কেজি
	মোট	১০০.০০ কেজি
পুষ্টি		
	প্রোটিন	২১.৭৪ কেজি
	বিপাকীয় শক্তি (কিলোক্যালোরি/কেজি)	২৯৬০ কেজি
	লাইসিন (%)	১.২২ কেজি
	মিথিওনিন (%)	০.৪৩ কেজি
	ক্যালসিয়াম (%)	১.৫ কেজি
	ফসফরাস (%)	০.৮৬ কেজি




### থোয়ার রেশন

ক্রমিক নং	উপাদান	পরিমাণ (কেজি)
১।	গম	২২ কেজি
২।	ভূট্টা	৩০ কেজি
৩।	সয়াবিন	২৮ কেজি
৪।	চালের কুঁড়া	১৫ কেজি
৫।	ঝিনুক চূর্ণ	১.৫ কেজি
৬।	ডি সি পি	২.৫ কেজি
৭।	ভিটামিন প্রিমিক্স	০.৫ কেজি
৮।	লাইসিন	০.১২৫ কেজি
৯।	মিথিওনিন	০.১২৫ কেজি
১০	খাবার লবণ	০.২৫ কেজি
	মোট	১০০.০০ কেজি
পুষ্টি		
	প্রোটিন	২০.৬২ কেজি
	বিপাকীয় শক্তি (কিলোক্যালোরি/কেজি)	৩০৩৩ কেজি
	লাইসিন (%)	১.১৫ কেজি
	মিথিওনিন (%)	০.৩৯ কেজি
	ক্যালসিয়াম (%)	১.৫ কেজি
	ফসফরাস (%)	০.৮৯ কেজি

### পুলেট রেশন

ক্রমিক নং	উপাদান	পরিমাণ (কেজি)
১।	গম	২৩ কেজি
২।	ভূট্টা	৩৬ কেজি
৩।	সয়াবিন	১৭ কেজি
৪।	চালের কুঁড়া	১৯.৩ কেজি
৫।	ঝিনুক চূর্ণ	২.৫ কেজি
৬।	ডি সি পি	১.৫ কেজি
৭।	ভিটামিন প্রিমিক্স	০.২৫ কেজি
৮।	লাইসিন	০.১০ কেজি
৯।	মিথিওনিন	০.১০ কেজি
১০	খাবার লবণ	০.২৫ কেজি
	মোট	১০০.০০ কেজি
পুষ্টি		
	প্রোটিন	১৬.৭৯ কেজি
	বিপাকীয় শক্তি (কিলোক্যালোরি/কেজি)	৩১২৫ কেজি
	লাইসিন (%)	০.৮৫ কেজি
	মিথিওনিন (%)	০.৩৩ কেজি
	ক্যালসিয়াম (%)	১.৫ কেজি
	ফসফরাস (%)	০.৯০ কেজি



## লেয়ার রেশন

ক্রমিক নং	উপাদান	পরিমাণ (কেজি)
১।	গম	১৬ কেজি
২।	ভুট্টা	৪০ কেজি
৩।	সয়াবিন	২২ কেজি
৪।	চালের কুঁড়া	১৪.৩ কেজি
৫।	ঝিনুক চূর্ণ	১.৫ কেজি
৬।	ডি সি পি	১.৫ কেজি
৭।	ক্যালসিয়াম কার্বনেট	৪.০ কেজি
৮।	ভিটামিন প্রিমিক্স	০.২৫ কেজি
৯।	লাইসিন	০.১০ কেজি
১০	মিথিওনিন	০.১০ কেজি
	মোট	১০০.০০ কেজি
পুষ্টি		
	প্রোটিন	১৭.০০ কেজি
	বিপাকীয় শক্তি (কিলোক্যালোরি/কেজি)	৩০৪৫ কেজি
	লাইসিন (%)	০.৯৫ কেজি
	মিথিওনিন (%)	০.৩৪ কেজি
	ক্যালসিয়াম (%)	২.৫ কেজি
	ফসফরাস (%)	০.৮০ কেজি

তবে উপরোক্ত রেশনে যে সমস্ত সদস্য উপাদান ব্যবহার করা হয়েছে তা সময়, আবহাওয়া এবং ঋতু পরিবর্তন এবং সহজলভ্যতার ওপর নির্ভর করে। এছাড়াও খামারিগণ বাজারে প্রাপ্ত প্রস্তুতকৃত গুণগত মানসম্পন্ন খাদ্য বয়স অনুযায়ী ব্যবহার করতে পারেন।

### আলোক ব্যবস্থাপনা

আলোক ব্যবস্থাপনা ডিম পাড়া মুরগির ক্ষেত্রে বিশেষ গুরুত্বপূর্ণ। দিনের সুনির্দিষ্ট ঘন্টা আলোর ব্যবস্থাপনার সাহায্যে মুরগির সর্বোচ্চ ডিম উৎপাদন পাওয়া সম্ভব।




## লেয়ার মুরগির জন্য প্রস্তাবিত ভ্যাক্সিনেশন কর্মসূচি

মুরগির বাচ্চা থেকে প্রাপ্ত বয়স্ক পর্যন্ত ভ্যাকসিন কর্মসূচি সাধারণত HI ট্রাইটার দেখে ভ্যাকসিন দেয়া উচিত। এতে মুরগি রোগাক্রান্ত হওয়ার আশংকা কম হবে এবং বায়োসিকিউরিটি ব্যবস্থা করা সহজতর হয়। ভ্যাকসিন কর্মসূচি পোল্ট্রি ডিজিজ বিশেষজ্ঞের পরামর্শ নিয়ে করা উচিত।

বয়স (দিন)	তারিখ	ভ্যাকসিনের নাম	মাত্রা ও প্রয়োগ পদ্ধতি
১০		এন.ডি ক্লোন-৩০ (১০০০ ডোজ/ভায়াল)	জীবন্তঃ ১ চোখে ১ ফোঁটা
১৪		গামবোরো ডি-৭৮ (১০০০ ডোজ/ভায়াল)	জীবন্তঃ ১ চোখে ১ ফোঁটা
২১		গামবোরো ডি-৭৮ (১০০০ ডোজ/ভায়াল)	জীবন্তঃ ১ চোখে ১ ফোঁটা
২৪		এন.ডি ক্লোন-৩০ (ম্যানোভ্যালেন্ট) (১০০০ ডোজ/ভায়াল)	জীবন্তঃ ১ চোখে ১ ফোঁটা
২৮		গামবোরো কিন্ড ভয়েল অ্যাডজুভ্যান্ট (১০০০ ডোজ/ভায়াল)	চামড়ার নিচে অথবা মাংশপেশিতে ঃ ০.২৫ মিঃলিঃ/মুরগী
৩৮		এন.ডি.কিন্ড ভয়েল অ্যাডজুভেন্ট (১০০০ ডোজ/ভায়াল) এন ডি. এইচ. আই টেস্ট	চামড়ার নিচে অথবা মাংশপেশিতে ঃ ০.২৫ মিঃলিঃ/মুরগী
৪০		ফাউল পক্স (ওভো-ডিপথেরিন) (১০০০ ডোজ/ভায়াল)	পাখার চামড়ার সুঁচ ফুটানোর মাধ্যমে
৬৮		এন.ডি.এইচ.আই. এন্টিবডি টাইটার পর্যবেক্ষন	-
৭০		ফাউল পক্স (ওভো-ডিপথেরিন) (১০০০ ডোজ/ভায়াল)	পাখার চামড়ার সুঁচ ফুটানোর মাধ্যমে
১২০		এন.ডি.কিন্ড ভয়েল অ্যাডজুভেন্ট (১০০০ ডোজ/ভায়াল)	চামড়ার নিচে অথবা মাংশপেশিতে ০.৫ মিঃলিঃ/মুরগি
৫ মাস		এন ডি. এইচ. আই এন্টিবডি টাইটার দেখা	
১২ মাস		ঐ	
১৮ মাস		ঐ	
২৪ মাস		ঐ	

উপরোক্ত ভ্যাকসিনগুলো যেহেতু ১০০০ ডোজ প্রতি ভায়ালে পাওয়া যায়, তাই ২০০টি মুরগি পালনকারী ৫ জন খামারি অনায়াসে ১টি ভায়াল ব্যবহার করতে পারেন। তবে খামারিদের সমিতিভুক্ত করে ভ্যাকসিন কর্মসূচি প্রয়োগ করলে আর্থিক খরচ কম হবে।



## উপকরণের মাধ্যমে ক্ষুদ্র ঋণের ব্যবস্থা করা

দেশের গ্রামীণ অবস্থার প্রেক্ষাপটে প্রাতিষ্ঠানিক ক্ষুদ্র ঋণ দারিদ্র্যবিমোচনের জন্য অত্যন্ত গুরুত্বপূর্ণ। ঋণের সরবরাহ উপকরণের মাধ্যমে বিতরণ করলে সফল বাস্তবায়ন নিশ্চিত করা সম্ভব। এ ক্ষেত্রে প্রাতিষ্ঠানিক সহযোগিতা বিশেষ গুরুত্ব বহন করে। প্রাতিষ্ঠানিক ব্যবস্থা থাকলে, সে ক্ষেত্রে খামারিদের সাথে একটি প্রতিষ্ঠান/সংগঠন/এনজিও এই মর্মে চুক্তি করবে যে, প্রথম সপ্তাহ থেকে ২২ সপ্তাহ পর্যন্ত (ডিমপাড়া শুরু হওয়া পর্যন্ত) বাচ্চা লালন-পালন, খাদ্য ও ভ্যাকসিন, ইত্যাদি খরচ ক্রেডিট হিসেবে খামারিদের মাঝে সরবরাহ করবে এবং খামারিগণ মুরগির শতকরা ৫০ ভাগ ডিম পাড়া শুরু করলে উপরোক্ত উপকরণ বাবদ খরচ ডিম থেকে প্রাপ্ত লভ্যাংশের মাধ্যমে সাপ্তাহিক কিস্তিতে সংগঠনকে পরিশোধ করবে। প্রতিষ্ঠানটি খামারিদের মাঝে নিম্নলিখিত উপকরণ প্রদানপূর্বক একটি চুক্তি করবে :

১. গুণগত মানসম্পন্ন মুরগির বাচ্চা
২. ভ্যাকসিন/টিকা
৩. গুণগত মানসম্পন্ন খাদ্য
৪. প্রয়োজনীয় ঔষধপত্র, ভিটামিন-প্রিমিক্স
৫. জীবাণুনাশক

খামারিগণ আর্থিকভাবে সমর্থ হলে নিজেরাও প্রশিক্ষণ গ্রহণ করে নিজ খরচে লেয়ার পালন শুরু করতে পারেন। সে ক্ষেত্রে মুরগি পালনের উপকরণসমূহ সঠিকভাবে বাছাই, সংগ্রহ, ব্যবহার নিশ্চিত করতে হবে। প্রয়োজনে স্থানীয় উপজেলা পশুসম্পদ অফিসের সহযোগিতা গ্রহণ করতে পারেন। আর্থিক সহায়তার জন্য স্থানীয় ব্যাংকে সাহায্য গ্রহণ করতে পারেন।

## সংগঠনের মাধ্যমে সকল উপকরণ ক্রয় এবং খামারের উৎপাদিত পণ্য বিক্রয়


খামারের সকল সদস্যের প্রয়োজনীয় উপকরণ ক্রয়ের ক্ষেত্রে একত্রে সংগ্রহ করলে আর্থিক সুবিধা পাওয়া যাবে। খাদ্য, ভ্যাকসিন, জীবাণুনাশক ইত্যাদি সামগ্রী ক্ষুদ্র খামারি যৌথভাবে সমিতির মাধ্যমে ক্রয় করে অর্থের সাশ্রয় করতে পারে। একইভাবে উৎপাদিত পণ্য-ডিম বিক্রয়ের ক্ষেত্রে দলগত ব্যবস্থা গ্রহণ করে ফড়িয়ার অংশের লাভ সমিতি ভোগ করতে পারে।

## ডিম সংগ্রহ ও সংরক্ষণ

ডিমপাড়া শুরু করলে খামারিগণ প্রতিদিনই দুই বার ডিম সংগ্রহ করেন এবং ডিমের ট্রেতে রাখতে হবে। যে সমস্ত স্থানে আলো-বাতাস ভালভাবে চলাচল করে সে সমস্ত স্থানে ডিম সংরক্ষণ করা ভাল। ডিম সাধারণত ৭ দিনের সাধারণ তাপমাত্রায় এভাবে না সংরক্ষণ করাই উত্তম।

## ডিম বাজারজাতকরণ

খামারিগণ সংগঠনের মাধ্যমে তাদের উৎপাদিত পণ্য বাজারজাত করতে পারেন। সংগঠনের



আওতায় খামারিগণ প্রতি ৭ দিনের ডিম সংগ্রহ করে নির্দিষ্ট স্থানে জমা রাখবেন এবং প্রতি ৭ দিন পর পর গ্রামীণ ফড়িয়াদের নিকট অথবা সরাসরি আড়ৎদারগণের নিকট বিক্রি করতে পারবেন। এই পদ্ধতিতে খামারিগণ আড়ৎদারদের সাথে দর কষাকষির মাধ্যমে তাদের পণ্য বিক্রি করতে পারবেন। বাজারজাতকরণের ভালো সুযোগ-সুবিধা না থাকলে অনেক সময় খামারিগণ কম মূল্যে ডিম বিক্রি করতে বাধ্য হন। ছাটাইকৃত মুরগিও খামারিগণ সরাসরি আড়ৎদারের নিকট বিক্রি করার ব্যবস্থা করতে পারেন। এ ছাড়া, মুরগির বিষ্টা মাছের খামারি ও অন্যান্য খামারিদের নিকট বিক্রি করে লাভবান হতে পারে।

## খরচাদি ও লাভ

খরচাদি এবং লাভ : ২০০টি লেয়ার পালনের আয়-ব্যয়ের হিসাব

আইটেম	ব্যয়	আয়
ঘর বাবদ খরচ	৪০০০.০০	
বাচ্চা	৪৮০০.০০	
ভ্যাকসিন মেডিসিন	৪৪২৯.০০	
খাদ্য বাবদ খরচ	১৪২৯২৯.০০	
ফিডার ড্রিংকার	৮০৪.০০	
মোট খরচ	১,৫৬,৯৬২.০০	
আয়		
ডিম		১৮১৪০৮.০০
নন লেইং বার্ড		১৮০০.০০
ছাটাইকৃত মুরগি		১৫৭৫০.০০
লিটার/ বিষ্টা	৮০ X ৫০	৪০০০.০০
মোট আয়		২,০২,৯৫৮.০০
নিট আয়	২,০২,৯৫৮.০০-১,৫৬,৯৬২.০০	৪৫৯৯৬.০০

খাদ্য ও ডিমের দামের ওঠা-নামার কারণে লাভ কম বা বেশি হতে পারে।

উপরোক্ত ফলাফল থেকে দেখা যায় যে, এই মডেলে ২০০টি মুরগি পালনকারীর সর্বমোট খরচ হয় ১,৫৬,৯৬২ এবং মোট আয়ের পরিমাণ ২,০২,৯৫৮ টাকা। প্রকৃত আয় থেকে খরচ বাদ দিলে নিট লাভের পরিমাণ দাঁড়ায় ৪৫,৯৯৬ টাকা। বাংলাদেশ উন্নয়ন প্রতিষ্ঠানের এক তথ্য থেকে জানা যায় যে, বাংলাদেশের একজন মানুষের বার্ষিক জীবনধারণের জন্য যেমন, খাদ্য এবং অন্যান্যসহ খরচ হয় প্রায় ৯০০০ টাকা এবং ৪ সদস্য বিশিষ্ট একটি পরিবারের বাৎসরিক ব্যয় হয় ৩৬০০০/= টাকা। সুতরাং ২০০টি মুরগি পালনকারী ৪ সদস্য বিশিষ্ট একটি পরিবার সংসারের খরচাদি ও সন্তান-সন্ততির শিক্ষাসহ যাবতীয় খরচ মিটিয়ে বছরে প্রায় ৯০০০ টাকা সঞ্চয় করতে পারেন। এখানে উল্লেখ্য, ৪ সদস্যবিশিষ্ট পরিবারের খরচ যথাক্রমে খাদ্য (৩৯%), শিক্ষা (২৮%), বিনোদন (১৭%), জামাকাপড় (১০%) ও অন্যান্য (৬%), যা লেয়ার পালন করে মেটানো সম্ভব।

## নিয়মিতভাবে সদস্যদের মতবিনিময় সভা

মডেলটি সুষ্ঠুভাবে বাস্তবায়নের জন্য পোল্ট্রি উৎপাদন সমিতি গঠন বিশেষ কার্যকর। উক্ত সমিতি প্রয়োজন ও সুযোগ-সুবিধার আলোকে একটি নিয়মিত বিরতিতে (সপ্তাহে/মাসে/প্রতি মাসে) আলোচনা





সভা করবে। উক্ত আলোচনার মাধ্যমে মডেলের বিভিন্ন অংগের বাস্তবায়ন, খামার পরিচালনার সমস্যা ও অন্যান্য সকল বিষয় আলোচনার মাধ্যমে সমাধান বা নির্ধারণ করার সুযোগ সৃষ্টি করার ব্যবস্থা করা হয়। নিয়ম অনুযায়ী সংগঠনের একটি গঠনতন্ত্র থাকা অত্যাাবশ্যিক।

**সংগঠনের সদস্যদের জন্য আপদকালীন আর্থিক সংস্থান করা**

সংগঠনের আয়ের অর্থ থেকে বা মাসিক চাঁদার ভিত্তিতে কিংবা লভ্যাংশের কিছু অর্থ থেকে নিয়মিতভাবে সংগঠনের জন্য ব্যাংক একাউন্টে অর্থ জমা করা প্রয়োজন। সদস্যভুক্ত খামারিরা খামারের জরুরি বা আপদকালীন প্রয়োজনে উক্ত অর্থ থেকে বিশেষ ঋণের সুযোগ গ্রহণ করবে।

**উপসংহার**

উপরোক্ত আলোচনা ও ফলাফল থেকে দেখা যায় যে, বিএলআরআই কর্তৃক উদ্ভাবিত লেয়ায় মডেলটি ক্ষুদ্র ও মাঝারি খামারিরা বসতবাড়িতে পালন করলে দারিদ্র্যবিমোচন, আত্ম-কর্মসংস্থান, আয় বৃদ্ধি, পারিবারিক পুষ্টিসহ সামাজিক মর্যাদা বৃদ্ধিতে সহায়ক ভূমিকা রাখতে সক্ষম হবে।

প্যাকেজের উদ্ভাবক : ড. কাজী মোঃ ইমদাদুল হক, ড. মোঃ সালাহ উদ্দিন, ড. নাথুরাম সরকার, দুলাল চন্দ্র পাল, মোঃ আব্দুর রশীদ, মোঃ শামীম আহমেদ, ডা. মোঃ গিয়াসউদ্দিন ও ডা. মোঃ জাহাঙ্গীর আলম

